

Novas cundiziuns per ils SPGR

(cc) Ils servetschs psichiatics dal Grischun (SPGR) duain survegnir la libertad d'agir sco interpresa ch'è necessaria per pudair realisar la nova finanziaziun tenor prestaziun dals ospitals e da las instituziuns per persunas cun impediments. Per quest intent duain vegnir adattadas las cundiziuns generalas legalas vertentas da la lescha. La regenza ha dà la revisiun da la lescha davart l'organisaziun dals servetschs psichiatics chantunals e da las chasas chantunales da dimora per persunas cun impediments psichics dal chantun Grischun (lescha davart l'organisaziun da la psichiatria) en consultaziun fin ils 30 d'avrigl 2012. La revisiun da la lescha tracta ils suandants puncts: Als SPGR vegnan surdads – en il dretg da construcziun – ils edifizis e stabiliments necessaris per il manaschi, cun excepziun dal bain puril Waldhaus. Ils SPGR vegnan munids cun in chapital da dotaziun da maximalmain 10 milliuns francs ed han la pussaivladad da furmar reservas.

Il transferiment – en il dretg da construcziun – dals bains immobigliars ch'èn necessaris per il manaschi als SPGR gida, ord vista da la regenza, als SPGR a sa far valair en conturns da martgà che daventan adina pli dinamics. Pervia da la midada dal princip da la cuvrida dals custs a la finan-

ziaziun dals ospitals e da las instituziuns per persunas cun impediments tenor prestaziun per il 1. da schaner 2012 ston ils SPGR ultra da quai avair avunda agen chapital per pudair ademplir da tut temp lur obligaziuns. Il chantun è interessà che la structura da la bilantscha dals SPGR na vegnia betg influenzada en moda negativa tras ina quota da chapital ester memia gronda. Ils SPGR ston pia vegnir munids cun chapital da dotaziun en ina moda ch'è adequata als ristgs. (Link als documents da consultaziun.)

L'onn 2002 èn las clinicas psichiaticas chantunales e las chasas chantunales da dimora e da lavur per persunas cun impediments psichics vegnidas excorporadas da l'administraziun chantunala e transferidas en in institut autonom da dretg public. Questa independenza è vegnida realisada cun la finamira da dar als SPGR la libertad d'agir per ch'els possian far frunt a las prestaziuns creschentas che vegnan fatgas envers ils ospitals ed envers las clinicas da furnir las prestaziuns en moda economica. Quella giada èsi vegni desisti da dotar l'institut cun agen chapital e d'al permetter da far reservas. Ils edifizis ed ils stabiliments vegnan mess a disposiziun dapi lura als SPGR cunter locaziun.



Ils servetschs psichiatics dal Grischun duain survegnir la libertad d'agir sco interpresa ch'è necessaria per pudair realisar la nova finanziaziun tenor prestaziun dals ospitals.